

關愛的故事



義工關懷勵積極

你地好，我叫欣欣，屋企淨係得媽媽、我同妹妹。我而家讀緊小學二年級。我最鍾意就係去社區中心，因為嗰度有好多嘢玩，同埋有義工姐姐幫我。

我地屋企好窮，媽媽學歷有限，唔識教我做功課，上小一嘅時候，好在有義工 Kathy 姐姐教我，幫我適應新環境。Kathy 姐姐好好人架，佢試過帶我去騎馬、放風箏、攀石，仲有「鋸扒」添呀！佢仲會聽我講我的開心同唔開心嘅嘢，我地仲約定每星期三晚傾電話，不過我係星期二晚已經等得好心急喇！

媽媽話好多謝 Kathy 姐姐帶我參加咁多活動，佢自己就無能力帶我去咁多地方見識。我而家參加咗社區中心嘅功課輔導班，仲有情緒小組同社交小組，令我變得開朗咗。而家唔開心，我會飲啖水同洗過面，然後攞著枕頭喊一場，瞓醒覺就無事。媽媽都讚我係成績同性格方面進步好多，唔會亂發脾氣。

我好感激義工姐姐同埋師長對我嘅愛護同關懷，我好想學姐姐咁幫人，大個之後，我希望做老師，好似姐姐咁教人，幫助好似我咁嚟自貧窮家庭嘅小朋友，等佢地都有機會擴闊眼界同發展潛能，生活得開心的同積極啲，唔會因為窮而無晒啲機會，一代一代咁窮落去。其實，有好多窮嘅小朋友都好乖、好聰明，只要俾個機會佢地，佢地一樣得架！

(476 字)